



*Rabu, 10 November 2021*  
**Ogen: Matius 16:19**



**Irakuti Ntah losari**



**A**di lembu jemak nalina, adi jelma cakapna man jemaken. Bagenda nina istilah si ngatakenca maka pengakun sekalak jelma ras uga pendalankenna membentuk karakter ras nilai jelma e jine. Ertina adi rusur icakapken kata la tuhu janah pendalanken cara geluh e pe mbue rusur sandiwarana maka kataken kalak ras tandai kalak kita selaku perbual.

Pengakun Petrus sanga isungkun Tuhan Jesus man bana, ise akapna Jesus e, mahanca Petrus ndatken pengergan bas Tuhan nari. Rasul Petrus ngatakenca "*Kam Kap Mesias, Anak Dibata Si Nggeluh*". Pengakunna e amin gia langa sempurna, enggo isuratken bas Buku Kegeluhen, maka menaken penggakunna e, Petrus itempa reh sertana selaku kalak si erkiniteken. *Sabab alu babah kalak ngaku, janah alu pusuh kalak tek.* Alu babahna Rasul Petrus ngakuken Tuhan Yesus Mesias, alu kuasa Tuhan pusuh Petrus ipelimbarui, janah erkiteken e ipadanken Tuhan maka ia me jadi penerus pelayanen Tuhan Jesus, seh asa sendah rasul Petrus tersinget selaku pemimpin Gereja si pemena, khususna man temanta i bas Gereja Katolik.

Pengakunta man Tuhan Jesus eme penandaita erkiteken pengalamen geluhta ras Tuhan Jesus, si sifatna pribadi. Tuhan ersura-sura nandangi pengakunta labo erkiteken pengetahuan/pemeteh saja, ntah arah pelajaren katekisasi ntah khotbah pendeta/pertua-diaken, tapi pengakun si rehna arah hubungan kekelengenta ras Tuhan e jine. Adi enggo siakuken maka kita tek, pengakunta e irakuti Tuhan ras padanNa. Maka kalak si tuhu-tuhu pengakunna man Tuhan pasti reh bagesna kiniteken amin gia kena percuban. Tapi kalak si tutus ngakuken kiniteken, padan Tuhan iosari i bas ia nari. Kalak si la ngakuken Tuhan i doni, ia pe labo iakuken Tuhan i surga.